

Eis Haaptaktivitéiten

Micro-Kredit

Wéi ass et lass gaangen?

De Félix, en Haitianer, war hei zu Letzebuerg op Besuch. Ech hu mech iwert seng flott Scoutsuniform gewonnen, a well ech wosst, daat een déi an Haiti net einfach sou ze kaafen kritt, hun ech hien gefrot, wou hien déi Uniform bitze gelooss hätt. Hien soot, den Estima hätt déi gebitzt. An hien hätt och seng Box gebitzt, déi hien unhuet, hien hätt all seng Box'en gebitzt.

Den Estima wär eben e gudd Schneider, hien hätt e Kolleg, deen hien e puer Mol an der Woch op seng Bitzmaschin giff loossen fir Kleeder zesummen ze bitzen. Leider hätt hien keng eegen Bitzmaschin, well déi ze déier wir.

Et lung also op der Hand, dee Mensch brauch eng Bitzmaschin, an da kann en säi Geld domat verdingen.

Geschwënn dono hu mir zu puer déi Iddi weidergesponnen, an mir waren eis sècher waat mir wollten: Leit ënnerstëtzen déi eppes schaffe wellen, an wou et awer un der klenger Finanzsprëtz feelt fir unzefänken, egal op daat am Handwerk, Commerce, an der Landwirtschaft oder soss iechenteppe ass. Dës Finanzsprëtz sollt dann eben e klenge Prêt sinn, deen mat Zësen zrëckbezuelt get. De Bénéfice dovun get fir nei Krediter agesaat oder am soziale Beraich (z.B. Edukatioun) ërem investéiert.

Waat ass e Micro-Kredit?

An sougenannte manner entwéckelte Länner wéi Haiti (*) kënnst et oft viir, daat aarm Leit kee Kredit op enger Bank kréien, well se keng materiell Garantien kënnen bidden. Si hun also nie d'Méiglechkeet fir hier Aktivitéiten auszubauen oder sech eppes Neies opzubauen.

An sou engem Fall kann dann e Micro-Kredit hëllefen, d.h. e klenge Kredit deen tëschent 50 an 300 Euro léien kéint. Den Demandeur brauch keng Garantien ze stellen, mee muss awer Zësen bezuelen.

D'Laafzeit vum Kredit geet vun engem hallwe Joër bis zu 2 Joër.

D'Héicht vum Kredit muss ëmmer un déi jeweilig Aktivitéit ugepasst sinn. Et muss opgepasst ginn, daat den Demandeur sech net zevill héich verscheld, d.h. guer net fähig ass fir de Kredit ofzebezuelen.

Wou schaffen mir konkret?

Mir hun 3 Leit ausgesicht, déi d'Verriedung vun AAH an Haiti iwwerhuelen. Et sinn dës 3 Leit, déi mir zënter Joëren kënnen a si hun eist vollsten Vertrauen, well mir schon um Niveau Scouten mat hinnen zesummege schafft hun a schaffen. Eis "Agence Rivière Froide", d.h. de Lionel, de Félix an den Johnny kommen aus der Gemeng Carrefour an méi genee aus der Uertschaft "Rivière Froide". Dës Uertschaft leit un engem

(* sou Länner sinn a punkto Menschlechkeet oft méi wait entwéckelt wéi eis raich Länner)

gréisseren Floss (deen t'selwécht heescht) deen aus de Bierger erofkennt. Mir kennen Rivière Froide zimlech gudd an wellen eis Aktivitéiten virun allem op dës Uertschaft konzentréieren. Rivière Froide ass eng Duerchgangsgéigend, wou ganz vill Leit aus de Bierger passéieren, déi hier Produits'en zu Port-au-Prince um Maart verkaafen wellen. Aus der Ursach hun mir ganz vill Micro-Krediter verdeelt a kleng Epicerien, well déi duerch den Passage vun Leit ganz gudd funktionnéieren.

Waat ass bis elo geschitt?

Mir hun am Ufank vum Joër déi néideg Formulären ausgeschafft, wéi den "Formulaire de Demande" deen en Demandeur vun engem Kredit muss ausfüllen an den "Contrat de prêt" deen am Moment vum Ausbezuelen vum Prêt ausgefellt get an vun beide Parteien ennerschriwwen get. Déi éischt Demanden waren séier do an sou sinn Ufank Juni déi éischt 28 Krediter ausbezuelen ginn, an zwar 18 Krediter zu 100 Euro mat enger Laafzeit vun engem Joër, 1 Kredit zu 80 Euro/12 Méint, 6 Krediter zu 60 Euro/8 Méint an 3 Krediter zu 50 Euro/6 Méint. Den Zënssatz war ëmmer 15%. Dës schéngt eigentlech zimlech héich, mee eis haitianesch Frënn hun bekräftegt, dat daat sou bei hinnen wir. Et wär e gënnchegen Taux an wann deen méi niddreg wir, da giffen si matt Demanden iwerlaaf gin.

D'Zrëckbezuelen vun deenen 28 Krediter huet Ufank August ugefangen. Am Hierscht hun mir eng Lëscht vu weideren Demandeurën kritt, déi mir natierlech zu Lëtzebuerg genee ënnert d'Lupp geholl hun. 6 Demanden waren direkt an der Rei a sinn Ufank Januar ausbezuelen ginn. Enn Januar waren 2 Leit vun eisem Komitee an Haiti. All Froën déi opstungen sinn ofgeklärt ginn, sou daat nach eng Kéier 64 Projet'en autoriséiert gin sinn. Am Ganzen hu mir vum Fréjoer 2005 bis März 2006 98 Micro-Krediter ausbezuelen mat engem Gesamtbetrag vun 10.515 Euro. Et muss een natierlech bemierken, daat d'Fongen heifir zu engem klengen Deel nés aus deem Dëppe geholl gi sinn, wou schon Krediter zrëckbezuelt waren.

Während eisem Openhalt an Haiti, hu mir och der Agence hiert Keessebuch kontrolléiert, an mir hun mat Erstaune musse feststellen daat d'Zrëckbezuelen ganz gudd funktionnéiert. Vun deenen 28 éischten Krediter waren nëmmen 2 Leit, déi net am Délai zrëckbezuelt hun. Mir haaten mat vill méi Schwieregkeeten gerechent.



Eis Haaptaktivitéiten

Lekol - d'Schoul

An Haiti hun iwwer d'Halschent vun de Kanner net d'Chance fir kënnen an d'Schoul ze goën. Opwuel et eigentlech dem Staat seng Charge ass fir sech ëm de Schoulunterricht ze këmmen, klappt daat guer nët. Et gët e klengen Minimum vu staatlechen Schoulen, mee déi meescht Schoulen sinn a privaten Hänn oder ginn vun ONG'en oder kierchlechen Arichtungen gedroen. Am Prinzip muss da bezuelt ginn fir kënnen an d'Schoul ze goen, d'Bicher, Hefter asw. kaschten souwisou an eng Uniform ass och an Haiti virgesinn. An villen Familien si keng Suen do fir d'Schoul ze bezuelen oder nëmmen fir en Deel vun de Kanner. Sou ginn se eben dann einfach net an d'Schoul. Déi logesch Follég ass, dat méi wéi 50 % vun den Haitianer net liesen a schréiwen kennen.

Während eisem Openhalt an Haiti am Januar 2005 si mir gewuer ginn daat eis Frënn op der Rivière Froide eng Schoul opgemaakt hun. Si hun vum November 2004 un en Deel vun engem Haus gelount an hun mat 3 Schoulmeeschtern a Jofferen probéiert 50 Kanner ze ënnerrichten. D'Halschent vun de Kanner hun souguer ganz an der Schoul gewunnt, well doheem an de Familien keng Plaz méi fir si war. An der Schoul huet et un alles gefeelt, keng anstänneg Bänken, keng anstänneg Toilett, keng Tafelen, kee Schoulmaterial, an virun

allem keng Suen, fir de Kanner eppes z'iessen ze kaafen.

Mir hun probéiert ze hëllef wou a wéi et méiglech war. Si kruten Suen zur Verfügung gestallt fir Mobilier ze kaafen, de Sanitaire an d'Réi ze machen, an och fir besser didaktescht Material ze kaafen. Well mir während eisem Openhalt am Januar 2005 leider net genuch Zait haatpen fir all Detailler ze klären, stungen nach ganz vill Froen op, virun allem a punkto Fonktionnéieren vun der Schoul. Mir wollten trotzdeem net blanne-männerchers zevill Suen an d'Schoul stiechen ouni méi Detailler ze hun.



Mir konnten eis dun daat Joer drop, am Januar 2006, op en Neits op der Plaz e Bild machen waat genee leeft. Leider hu mir missen feststellen daat déi Kanner, déi do gewunnt a giess hun, net méi do waren. Eis Frenn haaten leider net genuch Suen fir dese Service oprecht ze erhaalen. D'Schoul selwer dogéint, huet nach emmer gudd fonktionnéiert, d'Kannerzuel war vun 50 op 70 eropgaang.



Mir hun eis dës Kéier ganz vill Zait fir d'Schoul geholl, an vill Stonnen mat hinnen diskutéiert, fir ze kucken wéi mir déi Schoul an Zukunft organiséieren, respektiv finanzéieren kënnen. Et sinn u sech 5 verschidde Klassen, en 1. an 2. Spillschoul, en 1. an 2. Primärschoul, an eng "Classe spéciale". Daat sinn Schüler, vun jonk bis schon bèsse méi aal, déi nach kee Wuert liesen a schréiwen kënnen, an duerfir en speziellen Unterricht brauchen. D'Schoul huet och en Numm kritt (Ecole Le Reformiste de Rivière Froide) an si sinn amgaang mat hirem Ministère de l'Education ze verhandelen fir als offiziell Schoul unerkannt ze ginn.

Mir haaten am Dezember 2005 e ganz décken Don kritt vum Krëschtbazar vun de Steeseler Schoulkanner. Dës 6.400 Euro sinn geduecht fir d'Schoul op der Rivière Froide ze ënnerrichten. Eis Iddi ass fir dës Suen no engem Patenschaftensystem ze investéieren. Duerfir hu mir mat eise Frënn op der Plaz e Budget opgemaakt. Et brauch een ongeféier 6 Euro pro Mount pro Kand (bei 70 Kanner) fir d'Frais de fonctionnement vun der Schoul ze decken (Salaren, Bicher, Hefter, Kräid, Botzen, asw). Desweideren hu mir ausgerechent, waat d'lessen fir een Kand pro Mount giff kaschten, an zwar +/- 19 Euro. Mat 25 Euro de Mount kéint een also engem Kand d'Schoul plus eng waarm Molzecht pro Dag bezuelen. Mir wärten an deene nächste Méint probéieren déi Patenschaften ze organiséieren an fir d'Zukunft d'Schoul esou finanziell droen ze kënnen.



Eis Finanzen an e puer Wuert iwwer Haïti

Agence «Rivière Froide»



Lionel BELIZAIRE
35 Joër



Félix ETIENNE
38 Joër



Johnny LABORDE
29 Joër


Action Avenir Haïti

41a Mtée Willy Goergen
L-7322 Steinsel

contact: aah@haiti.lu

Dépenses

Um Graphique sin alleguerten d'Dépenses regroupéiert, déi am Laaf vum Joër 2005 getätégt gin sin.



D'Dépense «Urgence» ass matt iwwer 30% een relativ groussen Chiffer, mee daat ass doduerch bedingt datt fir deen Beräich eng extra Recette do ass. Matt deenen Suën gin Leit ennerstézt, déi se ganz dringend brauchen.

Haïti

Haïti, daat ärmsten Land vun den mëttelamerikanësch Inselen deelt sech d'Insel «Hispaniola» mat der Dominikanëscher Republik.

Ekonomësch ass Haïti haut total zerstéiert. Entwécklungshëllef kënn net nëmmen lues virun, well säitens vum Staat keng Ennerstézung do ass.

D'Leit sinn op sech gestallt an sou gesinn och Zuelen aus:

- 62% enner an eesäiteg ernährt;
- 70 % arbëchtslos;
- 50% Analphabetismus;
- 54% ouni Zougang zu Drénkwaasser



Am Februar 2006 waren Wahlen, wou de René Préval ass Gewënner erfirgaangen ass, an hien soumatt den neien Präsident gët. No Joëren vun Gewalt, Ennerdréckung a Korruptioun ass déi haitenech Populatioun frou iwwer dësen Ausgang, an hofft elo op eng besser Zukunft.

Eng Associatioun stellt sech fir...

AAAH - NEWS



Dir Dammen,
Dir Hären,

Virun engem Joër hun e puer Leit eng nei Vereenegung gegrënnt, mam Zil an Haiti ze hëllefen. D'Virgeschicht vun der Asbl Action Avenir Haiti as net esou einfach an e puer Wieder z'erklären. Si huet vielleicht schon 1991 ugefaang, wéi e Grupp Mierscher Guiden a Scouten mam Paschtouer Romain Ney an Haiti gefuer ass, fir e konkreten Projet ze realisieren. An de Joëren no '91 waren et dun déi Luerenzweiler Guiden a Scouten, déi sech bis haut ganz stark an Haiti engageiert hun.

Mir hun am Laaf vun de Joëren e Land kennegeléiert waat zu den ärmsten Länner vun der Welt gehéiert, a waat wirtschaftlech an oekologesch ruineiert ass. An de leschten zwee Joër huet Haiti dann och nach politesch an durch Umweltkatastrophen vill gelidden. Aus der „Pärel vun den Antillen“, wéi de Kolumbus se bei der Entdeckung genannt huet, as e riesegen Slum gin an dat virun der Dir vun de sougenannten Entwicklungslänner. Dëst as déi eng Säit vun Haiti...

Déi aaner Säit vun Haiti gesäit een eréischt dann wann een e puer mol do war an Land a Leit besser kennenléiert. Mir hun an de leschte Joëren vill Leit kennegeléiert, déi eis ëmmer ganz härzlech an hiere Famillien opgeholl hun. Haiti huet vill Leit déi sech engageieren wëllen, déi fir eng besser Zukunft an Haiti schaffen wëllen. Ech wëll hei vun dëser Geleegenheet profitieren an dem Lionel, Felix an Jhonny Merci soen fir déi gudd Zesummenaarbecht am leschte Joër. Si hun ganz vill fir AAH geschafft, hun Projet'en gesicht, Rapport'en geschriwwen a s'ech ëm d'Finanzen dohannen bekëmmert. Ouni hier Hëllef keinten mir nët op e positivt éischt Joer zréck kucken.

Eist éischt Joer huet bewisen, dass et meiglech ass mat enger klenger Hëllef (Microkrediter) de Leit Meiglechkeet ze gin, fir ze schaffen a sech eng eegen Existenz opzebauen an esou hiren Famillen en menschewürdegt Liewen ze garanteieren. Matt engem Satz kann een ganz gudd Zilsetzung vun AAH beschreiwen.

«Quand un homme a faim, mieux vaut lui apprendre à pêcher que de lui donner un poisson...»

Waat maachen mir?

- Ennerstëtzen vun klengen Entrepen an Handwierker durch Microfinancement.
- Ennerstëtzen vun enger Schoul fir Kanner vun mannerbemëttelten Elteren.

Dëst as just e kuerzen Iwwerbléck iwwer eis Aarbecht am vergaangene Joër.

Zum Schluss wëll ech awer alle Leit déi eis am leschte Joër finanziell oder materiell ennerstëtzt hun, e grouse Merci soen fir hiert Vertrauen an de Comité.

E grouse Merci gëllt awer och de bénévolen Leit aus dem Comité, déi vill Zäit an Engagement an Asbl stiechen.

An der Hoffnung op e weidert erfollegräicht Joer 2006 fir AAH.

Tom Lahr

Präsident
Action Avenir Haiti